

1051

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj 14.10.2020. godine, donosi

ZAKON O ZAŠTITI KULTURNE BAŠTINE

POGLAVLJE I. OPĆE ODREDBE

Član 1. (Predmet Zakona)

Ovim zakonom uređuju se dobra kulturne baštine (u daljem tekstu: dobra baštine), podjela dobara baštine, postupak zaštite dobara baštine, korištenje i namjena dobara baštine, prava i obaveze vlasnika dobara baštine, subjekti zaštite dobara baštine, finansiranje zaštite dobara baštine, nadzor nad primjenom zakona, kaznene odredbe i druga pitanja od značaja za zaštitu dobara baštine na području Tuzlanskog kantona (u daljem tekstu: Kanton).

Član 2. (Gramatička terminologija)

(1) Gramatička terminologija korištenja muškog i ženskog roda za pojmove u ovom zakonu, podrazumijeva oba roda.

(2) Izrazi koji se koriste u ovom zakonu, koji su navedeni u jednini ili množini, odnose se jednako i na jedninu i množinu, osim ako kontekst ne zahtijeva drugačije.

Član 3. (Pojam kulturne baštine)

Kulturna baština, u smislu ovog zakona, je zbir svih vrsta materijalnih i nematerijalnih dobara baštine Kantona koja se odlikuju: naučnim, umjetničkim, obrazovnim, historijskim, etnološkim, arheološkim, arhitektonskim i drugim značajem, bez obzira gdje se nalaze i u kojem su obliku vlasništva, uključujući i njihovo prirodno okruženje.

Član 4. (Pojam dobra baštine)

(1) Dobrom baštine smatra se nepokretno, pokretno i nematerijalno dobro baštine, te grupe dobara baštine i cjeline od posebnog kulturnog i historijskog značaja za Kanton.

(2) Dobro baštine u smislu ovog zakona je i prirodno okruženje materijalnog i nematerijalnog dobra baštine, koje je od značaja za njegovo postojanje, zaštitu, korištenje, izgled, očuvanje i istraživanje, kao i za njegov historijski kontekst, tradicionalni ambijent i vizuelnu dostupnost.

Član 5. (Zaštita, očuvanje i korištenje dobara baštine)

(1) Zaštita, očuvanje i korištenje dobara baštine je djelatnost od značaja za očuvanje kulturnog identiteta zajednica, grupa i pojedinaca u Kantonu i ostvarivanje prava na taj identitet.

(2) Zaštita dobara baštine je provođenje mjera pravne i stručne zaštite, propisanih odredbama ovog zakona, a u skladu s pravilima konzervatorske struke.

(3) Očuvanje dobara baštine je sistematsko praćenje stanja dobara baštine i preduzimanje mjera u cilju produženja trajanja svojstava koja predstavljaju njegovu kulturnu vrijednost, kao i sprečavanje propadanja dobara baštine, te osiguravanje njegove funkcije.

(4) Korištenje dobara baštine je upotreba dobara baštine za tradicionalnu ili drugu odgovarajuću namjenu, koja će osigurati njihovo očuvanje i održivo korištenje, na način kojim se poštuju njihov integritet i omogućava razumijevanje njihove kulturno-historijske vrijednosti.

(5) Djelatnost iz stava (1) ovog člana je od posebnog interesa za Kanton.

Član 6. (Svrha zaštite dobara baštine)

Svrha zaštite dobara baštine je:

a) zaštita i očuvanje dobara baštine u neoštećenom i izvornom stanju, te prenošenje dobara baštine budućim generacijama,

b) stvaranje povoljnijih uslova za opstanak dobara baštine i preduzimanje mjera potrebnih za njihovo redovno održavanje,

c) sprečavanje svake radnje kojom bi posredno ili neposredno moglo da se promjeni svojstvo, oblik, značenje i izgled dobra baštine i time ugrozi njegova utvrđena vrijednost,

d) sprečavanje protivpravnog postupanja i protivpravnog prometa dobara baštine, te nadzor nad iznošenjem dobara baštine u inostranstvo,

e) uspostavljanje uslova da dobra baštine prema svojoj namjeni i značenju služe potrebama pojedinaca i općem interesu,

f) razvijanje svijesti o dobrima baštine kao resursu održivog razvoja,

g) osiguranje dostupnosti dobara baštine.

POGLAVLJE II. VRSTE DOBARA BAŠTINE

Član 7. (Vrste dobara baštine)

Dobra baštine, u smislu ovog zakona su:

a) nepokretna dobra baštine,

b) pokretna dobra baštine,

c) nematerijalna dobra baštine.

Član 8. (Pojam nepokretnog dobra baštine)

Nepokretno dobro baštine može biti profani, sakralni, memorijalni, fortifikacijski ili infrastrukturni objekat, ili ostatak tog objekta, spomeničko-graditeljske cjeline, ili ostaci te cjeline, odnosno prostor s više nepokretnih dobara baštine, kao i prostor sa karakterističnim elementima interakcije čovjeka i prirode.

Član 9. (Vrste nepokretnih dobara baštine)

Nepokretna dobra baštine u smislu ovog zakona mogu biti:

a) Kulturno-historijski objekat kao pojedinačni nepokretni objekat od arhitektonskog, historijskog, arheološkog, etnološkog, umjetničkog, tehničkog ili drugog društvenog značaja, kao što je:

1) građevinsko-arhitektonski objekat ili njegovi ostaci i prepoznatljivi dijelovi, kao i građevina sa okolinom,

2) djelo primijenjene umjetnosti, slikarstva ili vajarstva, natpis, pećinsko stanište, djelo ili ostatak tehničke kulture, stare industrije ili infrastrukture i drugo dobro baštine koje je trajno vezano za određeni objekat ili mjesto,

3) pojedinačni arheološki spomenik ili strukture arheološkog karaktera,

4) mjesto i ostaci pojedinačnih građevina – spomenika,

5) historijski spomenik, memorijalni ili drugi spomen-objekat u vezi sa historijskim događajima i ličnostima.

b) Kulturno-historijska cjelina kao urbano ili ruralno naselje

ili njihovi dijelovi, uključujući pripadajuću infrastrukturu, odnosno prostor s više nepokretnih dobara baštine od posebnog kulturnog i historijskog značaja, a može biti:

1) graditeljska cjelina i kompleksi građevina različitih namjena, kao i prirodno-graditeljska cjelina,

2) arheološka cjelina,

3) mjesto i ostaci kompleksa građevina i graditeljskih cjelina.

c) Lokalitet ili područje kao topografski definisan prostor na zemlji, pod zemljom ili vodom, koji sadrži historijski karakteristične strukture nastale u interakciji čovjeka i prirode, a može biti:

1) arheološko nalazište,

2) kulturno-historijsko područje, uključujući znamenita mjesta vezana za određeni historijski događaj ili istaknutu ličnost,

3) kulturni krajolik, koji podrazumijeva sveukupnost nepokretnog, pokretnog i nematerijalnog dobra baštine, koji se odnose na određeni prostor, uključujući i prirodne odlike tog prostora (pećine, izvori, vrhovi, šume, pojedinačna memorijalna stabla i grupe stabala), molitvišta-dovišta, kulturna mjesta),

4) park i perivoj sa dobrima baštine.

d) Nepokretnim dobrom baštine, u smislu ovog zakona, smatra se i:

1) metodom rekonstrukcije i rehabilitacije ponovo uspostavljena nekretnina koja je porušena namjerno ili usljed elementarne nepogode, a koja je prije rušenja imala status zaštićenog dobra baštine ili status dobra baštine pod prethodnom zaštitom,

2) lokalitet dobra baštine uništenog u ratu od 1992. do 1995. godine, u cilju njegove zaštite, do završetka njegove rekonstrukcije i rehabilitacije,

3) objekat ili prostor u kojem se trajno čuvaju dobra baštine ili izvorna dokumentacija o njima.

Član 10.

(Pojam pokretnog dobra baštine)

Pokretno dobro baštine je svaki pokretni predmet, ili zbirka predmeta, koji je izraz svjedočanstva ljudskog stvaralaštva od prahistorije do danas, kao i paleontološki primjerak koji svjedoči o evoluciji prirode.

Član 11.

(Vrste pokretnih dobara baštine)

Pokretna dobra baštine su:

a) pokretni nalazi arheoloških istraživanja i iskopavanja izvedenih na kopnu i pod vodom, kao i slučajni arheološki nalazi,

b) predmeti od interesa za antropologiju i etnologiju: nošnje, nakit, namještaj, tekstilno pokućstvo, posuđe, tradicionalno oružje, oruđe, alati i drugo,

c) predmeti vezani za historiju, uključujući historiju nauke i tehnologije, kulture, religije i predmete vojne i društvene historije,

d) predmeti vezani za život zajednica, grupa, istaknutih pojedinaca kao i predmeti vezani za događaje od značaja za državu i društvo,

e) antologijska djela likovnih i primijenjenih umjetnosti i dizajna,

f) arhivska građa uključujući tekstualne zapise, dokumente, pisma, rukopise, karte i druge kartografske materijale, fotografije, kinematografske filmove, video zapise, zvučne zapise i štampane zapise,

g) antikviteti,

h) predmeti numizmatičkog i filatelističkog značaja,

i) prenosivi predmeti nastali razgradnjom historijskih spomenika.

Član 12.

(Definicija nematerijalnog dobra baštine)

Nematerijalno dobro baštine čine vještine, izvodenja, izražavanja, znanja, prakse kao i za njih vezani instrumenti, predmeti, rukotvorine i kulturni prostori koje zajednice, grupe i u nekim slučajevima pojedinci prepoznaju kao dio svoje kulturne baštine.

Član 13.

(Vrste nematerijalnih dobara baštine)

Nematerijalna dobra baštine su:

a) usmena tradicija, usmeno izražavanje i usmena književnost svih vrsta, uključujući jezik kao sredstvo prenošenja nematerijalne kulturne baštine,

b) izvođačke umjetnosti, folklorno stvaralaštvo u oblasti muzike, igre, plesa i dr.,

c) običaji, rituali i proslave,

d) znanja i vještine vezani uz prirodu i svemir,

e) tradicionalni obrti i vještine.

POGLAVLJE III. POSTUPAK ZAŠTITE DOBARA BAŠTINE

Član 14.

(Mjere i ciljevi zaštite dobara baštine)

(1) Razvijanje svijesti građana o značaju dobara baštine i neophodnosti njihove zaštite trajan je zadatak odgojno-obrazovnih, kulturnih i drugih organizacija i zajednica.

(2) Radi zaštite dobara baštine preduzimaju se sljedeće mjere:

a) istraživanje i prepoznavanje na terenu potencijalnih dobara baštine,

b) evidentiranje dobara za koja se može pretpostaviti da su potencijalna dobra baštine,

c) valorizacija dobara baštine,

d) utvrđivanje statusa dobara baštine,

e) naučno i stručno istraživanje podataka od značaja za dobro baštine,

f) upis dobara baštine u registar dobara baštine,

g) stalno nadgledanje i kontrola stanja dobara baštine,

h) čuvanje, održavanje i pravilno korištenje, planiranje i provođenje planova u skladu sa prirodom dobara baštine,

i) sprečavanje uništavanja, oštećenja ili sknavljenja, te zabrana svake radnje kojom se neposredno ili posredno može izmijeniti ili narušiti svojstvo dobara baštine,

j) konzervacija, restauracija, adaptacija, revitalizacija, rekonstrukcija, obnova, te nadzor nad interpolacijom unutar dobara baštine,

k) organizacija prenošenja dobara baštine,

l) zabrana prenošenja, raspolaganja i iznošenja dobara baštine u inostranstvo suprotno važećim propisima,

m) provođenje drugih mjera u skladu sa ovim zakonom, drugim propisima, ugovorima i međunarodnim konvencijama.

(3) Zaštita dobara baštine vrši se u cilju:

a) očuvanja dobara baštine u izvornom stanju,

b) stvaranja uslova za očuvanje dobara baštine u izvornom stanju,

c) sprečavanja svake radnje koja direktno ili indirektno ugrožava dobro baštine ili bi mogla promijeniti njegovo izvorno svojstvo,

d) revitalizacije i stvaranja uslova da dobra baštine služe potrebama zajednice, grupa i pojedinaca u okviru namjena koje će osigurati njihovo očuvanje,

e) očuvanja kulturne raznolikosti, njegovanja kreativnosti, razumijevanja različitih kultura i unapređivanja dijaloga među kulturama i religijama.

Član 15. (Status dobara baštine)

Dobra baštine imaju sljedeći status:

- a) potencijalna dobra baštine,
- b) dobra baštine pod prethodnom zaštitom Kantona,
- c) zaštićena dobra baštine.

Član 16. (Prijava i evidentiranje potencijalnog dobra baštine)

(1) Svako pravno i fizičko lice dužno je da u roku od 24 sata od momenta pronalaska dobra za koje se može pretpostaviti da ima svojstvo dobra baštine, prijavi pronađeno dobro nadležnoj javnoj ustanovi za obavljanje poslova zaštite i očuvanja dobara baštine iz člana 50. ovog zakona.

(2) Nadležna javna ustanova za obavljanje poslova zaštite i očuvanja dobara baštine će u roku od osam dana, od dana prijavljivanja pronađenog dobra iz stava (1) ovog člana, izvršiti istraživanje, prepoznavanje i utvrđivanje da li dobro ima svojstva potencijalnog dobra baštine. Ukoliko utvrdi da pronađeno dobro ima svojstva potencijalnog dobra baštine, dostavit će sve relevantne podatke o tom dobru Javnoj ustanovi Zavod za zaštitu i korištenje kulturno-historijskog i prirodnog naslijeđa Tuzlanskog kantona (u daljem tekstu: Zavod), koji će pronađeno dobro evidentirati u Listu potencijalnih dobara baštine.

(3) Evidentirano potencijalno dobro baštine ne smije se uništiti, izmijeniti ili umanjiti neko od njegovih svojstava, niti se može iznositi iz zemlje suprotno važećim propisima.

Član 17. (Dobro baštine pod prethodnom zaštitom Kantona)

(1) Zavod će u roku od osam dana od dana dostavljanja podataka iz člana 16. stav (2) ovog zakona donijeti rješenje o stavljanju potencijalnog dobra baštine pod prethodnu zaštitu Kantona, koje se dostavlja vlasniku i nadležnoj službi za prostorno planiranje ako se radi o nepokretnom dobru baštine, odnosno vlasniku i nadležnim javnim ustanovama za obavljanje poslova zaštite i očuvanja dobara baštine ako se radi o pokretnom dobru baštine.

(2) Na rješenje iz stava (1) ovog člana može se podnijeti žalba Ministarstvu za kulturu, sport i mlade Tuzlanskog kantona (u daljem tekstu: Ministarstvo), u roku od 15 dana od dana prijema rješenja.

(3) Nakon što postane konačno, rješenje iz stava (1) ovog člana objavljuje se u „Službenim novinama Tuzlanskog kantona“ i upisuje u Listu dobara baštine pod prethodnom zaštitom Tuzlanskog kantona, koja je poseban dio Registra dobara baštine Tuzlanskog kantona (u daljem tekstu: Registar dobara baštine) koji vodi Zavod.

(4) U provođenju mjera zaštite dobro baštine pod prethodnom zaštitom Kantona izjednačeno je sa zaštićenim dobrom baštine.

(5) Ako dobro baštine pod prethodnom zaštitom Kantona u roku od tri godine ne bude stavljeno pod zaštitu Kantona, rješenje iz stava (1) ovog člana prestaje da važi, o čemu se obavještava vlasnik i nadležna služba za prostorno planiranje ako se radi o nepokretnom dobru baštine, odnosno vlasnik i nadležna javna ustanova za obavljanje poslova zaštite i očuvanja dobara baštine ako se radi o pokretnom dobru baštine.

(6) Ministarstvo, na prijedlog Zavoda, donosi pravilnik kojim propisuje oblik, sadržaj i način vođenja Registra dobara baštine.

Član 18. (Elaborat o valorizaciji dobra baštine pod prethodnom zaštitom Kantona)

(1) Pod Elaboratom o valorizaciji dobra baštine pod prethodnom zaštitom Kantona (u daljem tekstu: Elaborat o valorizaciji dobra baštine), u smislu ovog zakona, podrazumijeva se naučna i stručna ocjena prikupljenih podataka u cilju utvrđivanja svojstva tog dobra i njegove kulturne vrijednosti (značaj, namjena, starost dobra i druga svojstva).

(2) Elaborat o valorizaciji dobra baštine obavezno sadrži prijedlog kategorije dobra baštine, foto i drugu dokumentaciju, te procjenu neophodnih mjera i troškova zaštite.

(3) Elaborat o valorizaciji dobra baštine izrađuje Zavod, uz stručnu pomoć javnih ustanova za obavljanje poslova zaštite i očuvanja dobara baštine koje vode svoje evidencije po vrstama dobara baštine za koja su nadležne.

Član 19. (Kategorizacija dobara baštine)

(1) Dobra baštine koja se nalaze na području Kantona svrstavaju se u tri kategorije:

- a) I kategorija: dobra baštine od izuzetnog značaja za građane i narode Kantona,
- b) II kategorija: dobra baštine od velikog značaja za građane i narode Kantona,
- c) III kategorija: ostala značajna dobra baštine.

(2) Ministarstvo, na prijedlog Zavoda, donosi Pravilnik o kategorizaciji dobara baštine.

Član 20. (Saradnja sa Komisijom za očuvanje nacionalnih spomenika Bosne i Hercegovine)

Radi zaštite i očuvanja dobara baštine Zavod je obavezan na saradnju sa Komisijom za očuvanje nacionalnih spomenika Bosne i Hercegovine, a u cilju:

- a) uspostavljanja centralnog državnog registra dobara baštine od značaja za Bosnu i Hercegovinu i sistema stalne komunikacije i razmjene informacija u oblasti zaštite dobara baštine,
- b) jačanja svijesti o ulozi dobara baštine u održivom razvoju i povratku izbjeglih lica,
- c) razvoja instrumenata za upravljanje dobrima baštine,
- d) jačanja saradnje domaćih i međunarodnih institucija u oblasti zaštite dobara baštine,
- e) realizacije principa otvorenog tržišta pri izradi projekata zaštite spomenika i sprečavanja monopola u tom segmentu koji onemogućava razvoj i uvođenje novih znanja na polju zaštite dobara baštine.

Član 21. (Prijedlog za stavljanje dobra baštine pod zaštitu Kantona)

(1) Zavod je obavezan da, najkasnije u roku od dvije godine od dana stavljanja dobra baštine pod prethodnu zaštitu Kantona, podnese Ministarstvu prijedlog za stavljanje dobra baštine pod zaštitu Kantona.

(2) Prijedlog iz stava (1) ovog člana sadrži: naziv dobra baštine, opis dobra baštine sa osnovnom dokumentacijom iz Elaborata o valorizaciji dobra baštine, granice dobra baštine sa zaštitnim pojasom i odgovarajuće katastarske i zemljišno-knjižne podatke, kategoriju dobra baštine, mjere za zaštitu, korištenje, namjenu i obnovu dobra baštine sa osnovnim tehničkim i finansijskim pokazateljima, ime i prezime, naziv vlasnika, odnosno nosioca drugog prava na dobru baštine i kome bi se dobro baštine trebalo povjeriti na čuvanje.

Član 22.**(Postupak hitne zaštite određenog dobra baštine)**

Kada to zahtijevaju potrebe hitne zaštite očuvanja određenog dobra baštine, Zavod će prioritarno pokrenuti postupak za stavljanje tog dobra pod zaštitu Kantona.

Član 23.**(Stavljanje dobra baštine pod zaštitu Kantona)**

(1) Dobro baštine stavlja se pod zaštitu Kantona odlukom Skupštine Tuzlanskog kantona (u daljem tekstu: Skupština Kantona), koja se objavljuje u „Službenim novinama Tuzlanskog kantona“.

(2) Odluku iz stava (1) ovog člana, kojom je zaštićeno nepokretno dobro baštine, donosilac je dužan dostaviti nadležnom sudu radi upisa svojstva zaštićenog dobra u zemljišnu knjigu, vlasniku zaštićenog nepokretnog dobra baštine, Ministarstvu i organima koji su, saglasno propisima o prostornom uređenju, nadležni za izradu prostorno-planskih dokumenata.

(3) Odluku iz stava (1) ovog člana, kojom je zaštićeno pokretno dobro baštine, donosilac dostavlja vlasniku pokretnog dobra baštine i javnoj ustanovi koja obavlja poslove zaštite i očuvanja dobara baštine koja u svojoj evidenciji vodi zaštićeno dobro baštine.

(4) Skupština Kantona, Ministarstvo, Zavod ili druga javna ustanova za obavljanje poslova zaštite i očuvanja dobara baštine, kao i svako zainteresovano lice u Bosni i Hercegovini može, na osnovu člana 5. Aneksa 8. Općeg okvirnog sporazuma za mir u Bosni i Hercegovini, podnijeti Komisiji za očuvanje nacionalnih spomenika Bosne i Hercegovine peticiju za proglašenje dobra baštine pod zaštitom Kantona nacionalnim spomenikom Bosne i Hercegovine.

Član 24.**(Sadržaj odluke o stavljanju dobra baštine pod zaštitu Kantona)**

(1) Odluka o stavljanju dobra baštine pod zaštitu Kantona sadrži:

- a) broj i datum odluke o stavljanju dobra baštine pod zaštitu Kantona,
- b) naziv dobra baštine,
- c) opis dobra baštine sa osnovnom dokumentacijom iz Elaborata o valorizaciji dobra baštine,
- d) granice dobra baštine sa zaštitnim pojasom i odgovarajućim katastarskim i zemljišno-knjižnim podacima nepokretnog dobra baštine,
- e) kategoriju dobra baštine,
- f) mjere za zaštitu, korištenje i obnovu dobra baštine sa osnovnim tehničkim i finansijskim pokazateljima,
- g) podatke o vlasniku, odnosno nosiocu drugog prava na dobro baštine,
- h) zabranu korištenja ili ograničenje prava korištenja dobrom baštine, kao i visinu eventualno ugovorene naknade zbog zabrane ili ograničenja korištenja dobra baštine,
- i) namjenu dobra baštine, prava i obaveze vlasnika ili nosioca drugog prava na dobro baštine,
- j) druga pitanja od značaja za zaštitu i unapređenje dobra baštine.

(2) Na osnovu odluke iz stava (1) ovog člana vrši se upis zaštićenog dobra baštine u Registar dobara baštine.

Član 25.**(Prestanak statusa zaštićenog dobra baštine)**

(1) Zaštićeno dobro baštine može izgubiti status zaštićenog dobra baštine ako je u međuvremenu:

- a) potpuno uništeno ili teško oštećeno, a nema mogućnosti

za njegovu rekonstrukciju ili rehabilitaciju zbog nedostatka odgovarajuće dokumentacije, odnosno relevantnih podataka ili kritične količine ostatka njegove strukture,

b) potpuno uništeno ili teško oštećeno, a nema mogućnosti za njegovu rekonstrukciju ili rehabilitaciju na lokaciji na kojoj se nalazilo, a lokacija je od bitnog značaja za njegov kulturni i historijski značaj,

c) arheološko nalazište potpuno istraženo, pokretni nalazi izvađeni i smješteni van nalazišta, a na nalazištu nema nepokretnih nalaza.

(2) Odluka o prestanku statusa zaštićenog dobra baštine donijet će se i u slučaju ako je status utvrđen na osnovu netačnih podataka o njegovim svojstvima, karakteristikama ili značaju.

(3) Na prestanak statusa zaštićenog dobra baštine shodno se primjenjuju odredbe o donošenju, objavljivanju i dostavljanju odluke o stavljanju dobra baštine pod zaštitu Kantona.

Član 26.**(Obilježavanje zaštićenih dobara baštine)**

(1) Sva zaštićena dobra baštine, kao i objekte u kojima su smještene zbirke zaštićenih dobara baštine (muzeji, arhivi, galerije i dr.) Zavod je dužan da obilježi posebnim oznakama sa relevantnim podacima o zaštićenom dobru baštine.

(2) Ministarstvo, na prijedlog Zavoda, donosi Pravilnik o obilježavanju zaštićenih nepokretnih dobara baštine.

(3) Zabranjeno je uklanjanje ili oštećivanje oznaka zaštićenih dobara baštine.

Član 27.**(Zaštitni pojas)**

(1) Ako za područje nepokretnog potencijalnog dobra baštine i dobra baštine pod prethodnom zaštitom Kantona nisu doneseni prostorno-planski dokumenti, do donošenja tih dokumenata, širinu zaštitnog pojasa utvrđuje rješenjem Zavod.

(2) Zaštitni pojas ne smije se koristiti u svrhe koje nisu u skladu sa prirodom, namjenom ili značajem dobra baštine ili koje mogu dovesti do oštećenja ili umanjenja vrijednosti dobra baštine.

(3) Primjerak rješenja iz stava (1) ovog člana Zavod dostavlja organima koji su, saglasno propisima o prostornom uređenju, nadležni za izradu prostorno-planskih dokumenata.

Član 28.**(Dostavljanje podataka o zaštićenim nepokretnim dobrima baštine)**

(1) U postupku izrade prostorno-planskih dokumenata, Zavod je dužan da organu koji je saglasno propisima o prostornom uređenju nadležan za izradu tih dokumenata dostavi pregled nepokretnih dobara baštine koja imaju status potencijalnih dobara baštine, dobara pod prethodnom zaštitom Kantona i zaštićenih dobara baštine, sa opisom svakog naznačenog dobra, valorizacijom prostora i dobra baštine, te mjerama zaštite koje je neophodno preduzeti.

(2) Organ koji je saglasno propisima o prostornom uređenju nadležan za izradu prostorno-planskih dokumenata obavezan je dostaviti Zavodu detaljne prostorno-planske dokumente, radi ocjene usklađenosti dokumenata sa utvrđenim režimom zaštite zaštićenih dobara baštine.

Član 29.**(Izvođenje radova na dobru baštine)**

- (1) Bez saglasnosti Zavoda investitor ne može izvoditi radove na: a) zaštićenom nepokretnom dobru baštine i u njegovom

zaštitnom pojasu, kojima bi se neposredno ili posredno mogao izmijeniti izgled, autentičnost, originalnost ili drugo svojstvo tog dobra baštine,

b) dobru baštine pod prethodnom zaštitom Kantona i u njegovom zaštitnom pojasu iz člana 17. ovog zakona,

c) evidentiranom potencijalnom dobru baštine i u njegovom zaštitnom pojasu iz člana 16. stav (2) ovog zakona,

d) području gdje se opravdano pretpostavlja da se mogu naći dobra baštine.

(2) Pod radovima u smislu stava (1) ovog člana podrazumijevaju se i radovi postavljanja reklama, rasvjete, panoa i drugog mobilijara.

(3) Kada se radi o obnovi ili novoj izgradnji objekta izvan obuhvata zaštitnog pojasa zaštićenog nepokretnog dobra baštine, ali na područjima koja graniče sa zaštitnim pojasom, nadležni organ za odobravanje građenja, na projekat obnove ili nove izgradnje objekta, pribavlja stručno mišljenje Zavoda.

(4) O zahtjevu investitora za izdavanje saglasnosti za izvođenje radova na dobrima baštine iz stava (1) ovog člana i području gdje se opravdano pretpostavlja da se mogu naći dobra baštine Zavod odlučuje rješenjem u roku od 15 dana od dana prijema zahtjeva.

(5) Na rješenje iz stava (4) ovog člana može se podnijeti žalba Ministarstvu u roku od 15 dana od dana prijema rješenja.

(6) Rješenje kojim se daje saglasnost za izvođenje radova na dobrima baštine iz stava (1) ovog člana, obavezno sadrži i mjere zaštite.

(7) U slučaju kada se investitor ne pridržava mjera zaštite u smislu stava (6) ovog člana ili ako izvodi radove na dobrima baštine iz stava (1) ovog člana i području gdje se opravdano pretpostavlja da se mogu naći dobra baštine bez saglasnosti Zavoda, Zavod je dužan da obavijesti nadležne organe radi pokretanja postupka obustave radova dok se ne provedu utvrđene mjere zaštite, kao i da zatraži da investitor nadoknadi pričinjenu štetu.

Član 30.

(Obustava izvođenja građevinskih radova)

(1) Kada se u toku izvođenja građevinskih radova otkrije dobro za koje se može pretpostaviti da ima svojstvo dobra baštine ili se javi nepredviđena opasnost za zaštićeno dobro baštine, investitor je dužan da obustavi radove i bez odlaganja obavijesti o tome Zavod.

(2) Zavod će najduže u roku od tri dana od prijema obavještenja, ako to ocijeni potrebnim, odrediti mjere osiguranja i zaštite dobra baštine iz stava (1) ovog člana, a može da donese i rješenje o privremenom obustavljanju daljih radova sa utvrđenim mjerama zaštite.

(3) Na rješenje iz stava (2) ovog člana investitor može podnijeti žalbu Ministarstvu u roku od 15 dana od dana prijema rješenja.

(4) Žalba na rješenje ne odlaže izvršenje rješenja.

(5) Privremena obustava radova iz stava (2) ovog člana ne može trajati duže od 30 dana od dana donošenja rješenja o privremenoj obustavi radova.

(6) Investitor snosi troškove provođenja mjera osiguranja i zaštite iz stava (2) ovog člana kao i troškove pričinjene štete nastale privremenom obustavom radova.

Član 31.

(Provođenje mjera zaštite na zaštićenom dobru baštine)

(1) Mjere zaštite na zaštićenom dobru baštine provodi stručno pravno odnosno fizičko lice, pod neposrednim nadzorom i uputstvima Zavoda.

(2) Izuzetno, uz saglasnost Ministarstva, mjere iz stava (1) ovog člana može provoditi neposredno Zavod, ako ima odgovarajuću opremu i stručne kadrove.

Član 32.

(Odobrenje za arheološka istraživanja)

(1) Odobrenje za arheološka istraživanja na području Kantona izdaje Ministarstvo na zahtjev pravnog ili fizičkog lica, uz koji se prilažu dokazi o ispunjavanju uslova stručne i tehničke osposobljenosti za obavljanje arheoloških istraživanja.

(2) O zahtjevu za izdavanje odobrenja iz stava (1) ovog člana Ministarstvo odlučuje rješenjem, uz pribavljeno mišljenje Zavoda.

(3) Rješenje kojim se odobravaju arheološka istraživanja obavezno sadrži kadrovske i tehničke uslove koje mora ispunjavati izvođač arheoloških istraživanja, naznaku područja istraživanja, pravac i obim radova, mjere zaštite iskopenih lokaliteta, nepokretnih i pokretnih dobara baštine, naznaku obaveznog prisustva stručnih lica zaposlenika Javne ustanove Muzej istočne Bosne u Tuzli (u daljem tekstu: Muzej) tokom arheološkog istraživanja, kao i druga pitanja od značaja za očuvanje iskopenih dobara baštine.

(4) Ministarstvo će rješenjem odbiti zahtjev za izdavanje odobrenja ukoliko podnosilac zahtjeva nema odgovarajući stručni kadar i opremu neophodnu za arheološka istraživanja.

(5) Žalba na rješenje iz stavova (3) i (4) ovog člana nije dopuštena, a može se pokrenuti upravni spor kod nadležnog suda.

(6) Ministarstvo donosi Pravilnik o tehničkim i kadrovskim uslovima za vršenje arheoloških istraživanja.

Član 33.

(Pronađena pokretna dobra prilikom arheološkog istraživanja)

(1) Dobra pronađena prilikom arheološkog istraživanja vlasništvo su jedinice lokalne samouprave na čijoj teritoriji su vršena arheološka istraživanja.

(2) Sva pokretna dobra koja su pronađena tokom arheološkog istraživanja će biti predana u Muzej radi dalje obrade i evidencije.

(3) Muzej će nakon stručne obrade i evidencije navedena dobra predati javnom muzeju odnosno muzejskoj zbirci jedinice lokalne samouprave na čijoj teritoriji su pronađena.

(4) Ako u jedinici lokalne samouprave ne postoji javni muzej ili muzejska zbirka sa adekvatnim uslovima za čuvanje i prezentaciju pokretnih dobara, pronađena pokretna dobra će biti smještena u Muzej.

(5) Ukoliko se prilikom stručne obrade pronađenih pokretnih dobara ustanovi da neko od tih dobara ima svojstvo dobra baštine, Muzej će dostaviti Zavodu relevantne podatke o tom dobru i isto pohraniti u Muzeju, kao matičnom muzeju Kantona.

Član 34.

(Zabranu premještanja i preduzimanja drugih radnji na dobru baštine)

Zabranjeno je bez odobrenja Ministarstva iskopavati, premiještati, uklanjati, pokrivati drugom građevinom, sadnicama ili na drugi način mijenjati dobro baštine i njegov zaštitni pojas, te bitno mijenjati kulturni krajolik i sliku mjesta.

POGLAVLJE IV. KORIŠTENJE I NAMJENA ZAŠTIĆENIH DOBARA BAŠTINE

Član 35.

(Korištenje i namjena zaštićenog dobra baštine)

(1) Pod korištenjem i namjenom zaštićenog dobra baštine podrazumijeva se stvaranje uslova koji omogućavaju da zaštićeno dobro baštine bude dostupno javnosti radi zadovoljavanja odgojno-obrazovnih, kulturnih, vjerskih, umjetničkih i naučnih potreba fizičkih i pravnih lica, kao i za zadovoljavanje potreba privrednih aktivnosti, na način kojim se poštuje njegov integritet i omogućava razumijevanje njegove kulturno-historijske vrijednosti.

(2) Zaštićeno dobro baštine ne smije se koristiti suprotno mjerama zaštite utvrđenim u odluci o stavljanju dobra baštine pod zaštitu Kantona.

(3) Ako vlasnik ili nosilac drugog prava na zaštićenom dobru baštine, zaštićeno dobro baštine upotrijebi protivno namjeni, te zbog toga nastane šteta na tom dobru, Zavod može rješenjem da obaveže vlasnika, odnosno nosioca drugog prava na zaštićenom dobru baštine, da štetu otkloni vraćanjem zaštićenog dobra baštine u prijašnje stanje.

(4) Odredbe stavova (1) i (2) ovog člana shodno se primjenjuju i na zaštitni pojas zaštićenog dobra baštine.

Član 36.

(Prilagođavanje namjene zaštićenog nepokretnog dobra baštine)

(1) Zaštićeno nepokretno dobro baštine može se postupkom revitalizacije, rehabilitacije i rekonstrukcije prilagoditi savremenim potrebama i namjenama za: biblioteku, muzej, galeriju, održavanje predstava, koncerata, organizovanje predavanja i slične namjene, kao i za obavljanje ugostiteljsko-turističke djelatnosti.

(2) Prilagođavanje zaštićenog nepokretnog dobra baštine za određene potrebe i namjene može se vršiti samo uz prethodnu saglasnost Ministarstva, koje pribavlja mišljenje Zavoda.

Član 37.

(Korištenje zaštićenih pokretnih dobara baštine)

(1) Zaštićena pokretna dobra baštine mogu se koristiti za izlaganje putem stalnih ili povremenih izložbi, za odgojno-obrazovne i turističko-propagandne svrhe kao i za naučnu obradu.

(2) Saglasnost za korištenje zaštićenog pokretnog dobra baštine daje Ministarstvo, uz prethodno pribavljeno mišljenje javne ustanove nadležne za obavljanje poslova zaštite i očuvanja tog dobra baštine.

POGLAVLJE V. PRAVA I OBAVEZE VLASNIKA ZAŠTIĆENOG DOBRA BAŠTINE

Član 38.

(Vlasništvo nad zaštićenim dobrom baštine)

(1) Za zaštićeno nepokretno i pokretno dobro baštine mora biti utvrđen vlasnik.

(2) Ako zaštićeno dobro baštine iz stava (1) ovog člana nema vlasnika ili ako dobro baštine ostane bez vlasnika, vlasnikom tog dobra baštine postaje jedinica lokalne samouprave na čijem području se nalazi.

(3) Dobro za koje se pretpostavlja da ima svojstva dobra baštine, a koje se nalazi u se nađe u zemlji ili vodi, vlasništvo je jedinice lokalne samouprave na čijem području se nalazi.

(4) Lice koje smatra da ima pravo vlasništva na dobru iz stava (3) ovog člana može kod nadležnog suda da podigne tužbu radi utvrđivanja prava vlasništva.

Član 39.

(Prava vlasnika zaštićenog dobra baštine)

(1) Vlasnik zaštićenog dobra baštine, u skladu sa ovim zakonom, ima pravo:

a) koristiti i raspolagati zaštićenim dobrom baštine,

b) na besplatnu stručnu pomoć Zavoda, radi pravilne zaštite i očuvanja dobra baštine na način propisan ovim zakonom i mjerama utvrđenim odlukom o stavljanju tog dobra baštine pod zaštitu Kantona,

c) na pravičnu naknadu zbog zabrane ili ograničenja korištenja zaštićenog dobra baštine,

d) na naknadu za korištenje zaštićenog dobra baštine u propagandne, reklamne, turističke i druge svrhe, u skladu sa ugovorom koji vlasnik zaštićenog dobra baštine zaključi sa korisnikom.

(2) Naknadu iz stava (1) tačka c) ovog člana za zaštićeno dobro baštine odobrava Skupština Kantona, a za dobro baštine pod prethodnom zaštitom Kantona naknadu odobrava Zavod, na osnovu ugovora kojeg zaključuje sa vlasnikom dobra baštine.

Član 40.

(Obaveze vlasnika zaštićenog dobra baštine)

Vlasnik zaštićenog dobra baštine obavezan je da:

a) postupa sa zaštićenim dobrom baštine s dužnom pažnjom, a posebno da ga čuva i redovno održava,

b) blagovremeno provodi mjere zaštite u skladu sa ovim zakonom, odlukom o stavljanju tog dobra pod zaštitu Kantona i drugim propisima,

c) o svim promjenama, oštećenjima ili uništenjima, nestanku ili krađi zaštićenog dobra baštine, odmah nakon saznanja, a najkasnije u roku od 24 sata od saznanja, obavijesti Zavod,

d) dopusti stručna i naučna istraživanja, tehnička i druga snimanja, kao i provođenje mjera zaštite na zaštićenom dobru baštine,

e) omogući dostupnost zaštićenog dobra baštine javnosti, koja se može ograničiti mjerama zaštite Zavoda,

f) očuva cjelovitost zaštićene zbirke pokretnih dobara baštine,

g) izvršava sve druge obaveze propisane ovim zakonom i drugim propisima.

Član 41.

(Neprovođenje propisanih mjera zaštite od strane vlasnika zaštićenog dobra baštine)

(1) Ako vlasnik zaštićenog dobra baštine pravovremeno ne provede propisane mjere zaštite na zaštićenom dobru baštine Zavod će ga opomenuti i odrediti mu rok do kada je obavezan da tu mjeru provede, uz upozorenje da će u protivnom takva mjera biti provedena na njegov trošak.

(2) Ako vlasnik zaštićenog dobra baštine ni poslije opomene ne provede propisanu mjeru zaštite ili je ne provede u određenom roku, tu mjeru će da provede Zavod na trošak vlasnika zaštićenog dobra baštine.

(3) Zavod rješenjem utvrđuje obavezu vlasnika na naknadu troškova i visinu troškova izvršenja takve mjere.

(4) Na rješenje iz stava (3) ovog člana vlasnik zaštićenog dobra baštine može podnijeti žalbu Ministarstvu u roku od 15 dana od dana prijema rješenja.

Član 42.

(Troškovi očuvanja i održavanja zaštićenog dobra baštine)

(1) Troškove očuvanja i održavanja zaštićenog dobra baštine, te provođenja mjera zaštite snosi vlasnik zaštićenog dobra baštine.

(2) Ako održavanje zaštićenog dobra baštine ili radovi na njegovom popravku, konzervaciji, restauraciji ili provođenju mjera zaštite zahtijevaju vanredne troškove koji premašuju redovne troškove održavanja i prihode ili druge koristi koje vlasnik ima od zaštićenog dobra baštine, vlasnik zaštićenog dobra baštine ima pravo da podnese zahtjev za naknadu vanrednih troškova.

(3) Vanredne troškove za očuvanje i održavanje dobra baštine pod prethodnom zaštitom Kantona i zaštićenog dobra baštine snosi Zavod na osnovu ugovora zaključenog sa vlasnikom tog dobra, a sredstva se osiguravaju iz budžeta Kantona.

Član 43.

(Proučavanje zaštićenog dobra baštine)

(1) Vlasnik zaštićenog dobra baštine mora omogućiti istraživanje i dokumentovanje istog, kao i provođenje mjera zaštite i očuvanja, licu koje za to ima odobrenje Zavoda.

(2) Za ograničenja iz stava (1) ovoga člana vlasnik zaštićenog dobra baštine nema pravo na naknadu, osim u slučajevima kada dokaže da je zbog toga pretrpio štetu.

Član 44.

(Ustupanje zaštićenog dobra baštine)

(1) Vlasnik zaštićenog dobra baštine obavezan je privremeno dati u posjed pokretno dobro baštine radi njegova izlaganja, odnosno omogućiti posjećivanje nepokretnog dobra baštine radi razgledavanja.

(2) Vlasnik zaštićenog dobra baštine i organizator izlaganja, odnosno posjećivanja, sklopit će ugovor, kojim se pored ostalih ugovornih obaveza utvrđuje način postupanja i davanje garancije za slučaj oštećenja, uništenja, krađe ili nestanka, kao i obaveza osiguranja zaštićenog dobra baštine kod osiguravajućeg društva.

(3) Sve troškove u vezi s izlaganjem, odnosno posjećivanjem, dužan je podmiriti organizator, ako ugovorom sklopljenim između vlasnika zaštićenog dobra baštine i organizatora nije drugačije ugovoreno.

Član 45.

(Iznošenje zaštićenih dobara baštine)

(1) Zaštićena dobra baštine ne mogu se iznositi u inostranstvo.

(2) Izuzetno, zaštićeno dobro baštine može se privremeno iznijeti u inostranstvo radi izlaganja, ekspertize, vršenja radova na konzervaciji i restauraciji zaštićenog dobra baštine ili drugih opravdanih razloga, uz odobrenje nadležnog organa, u skladu sa važećim propisima.

Član 46.

(Prodaja zaštićenog dobra baštine)

(1) Vlasnik koji namjerava prodati zaštićeno dobro baštine, dužan je istovremeno ponuditi zaštićeno dobro baštine Kantonu i jedinici lokalne samouprave na čijoj se teritoriji dobro baštine nalazi, navodeći cijenu i druge uslove prodaje.

(2) Pravo preče kupnje ponuđenog dobra baštine ima jedinica lokalne samouprave u odnosu na Kanton.

(3) Kanton i jedinica lokalne samouprave moraju se izjasniti o toj ponudi u roku od 60 dana od dana prijema pisane ponude.

(4) Ako pravno lice iz stava (3) ovog člana ne iskoristi pravo preče kupnje, dužno je u roku od 30 dana od dana prijema ponude, o tome obavijestiti drugo pravno lice koje ima pravo preče kupnje i vlasnika zaštićenog dobra baštine.

(5) Nakon isteka roka iz stava (3) ovog člana, vlasnik može zaštićeno dobro baštine prodati drugom licu uz cijenu koja ne može biti niža od cijene navedene u ponudi iz stava (1) ovog člana i pod uslovima koji za kupca nisu povoljniji od uslova sadržanih u ponudi. U protivnom, pravno lice iz stava (1) ovog člana može, u roku od 30 dana od dana saznanja, pokrenuti sudski postupak za poništenje ugovora o prodaji dobra trećem licu.

Član 47

(Eksproprijacija zaštićenog nepokretnog dobra baštine)

(1) Smatra se da postoji javni interes Kantona za eksproprijaciju zaštićenog nepokretnog dobra baštine:

a) ako prijeti opasnost od oštećenja ili uništenja zaštićenog dobra baštine, a vlasnik zaštićenog dobra baštine nema mogućnosti ili interesa da osigura provođenje svih određenih mjera zaštite i očuvanja,

b) ako na drugi način ne može da se osigura obavljanje arheoloških istraživanja iskopavanja ili provođenje mjera zaštite zaštićenog dobra baštine,

c) ako na drugi način nije moguće osigurati dostupnost zaštićenog dobra baštine za javnost.

(2) Postupak za eksproprijaciju pokreće se na prijedlog Zavoda, a provodi se u skladu sa propisima o eksproprijaciji.

Član 48.

(Ograničenje prava korištenja zaštićenog nepokretnog dobra baštine)

(1) Kada su ispunjeni uslovi za eksproprijaciju zaštićenog nepokretnog dobra baštine iz člana 47. ovog zakona Zavod, na prijedlog vlasnika zaštićenog nepokretnog dobra baštine, može odlučiti da se umjesto eksproprijacije samo ograniči pravo korištenja zaštićenog nepokretnog dobra baštine.

(2) U slučaju iz stava (1) ovog člana Zavod je dužan da nadoknadi vlasniku štetu koja bi nastala tim ograničenjem.

(3) Visina štete utvrđuje se ugovorom između Zavoda i vlasnika zaštićenog nepokretnog dobra baštine.

(4) U slučaju spora visinu štete utvrđuje nadležni sud.

Član 49.

(Primjena odredbi o pravima i obavezama vlasnika zaštićenog dobra baštine)

Odredbe ovog zakona o pravima i obavezama vlasnika zaštićenog dobra baštine na odgovarajući način odnose se i na nosioce drugih prava na zaštićenom dobru baštine, ako je vlasnik nepoznat, nedostupan ili je ugovorom na njih prenio prava i obaveze u smislu ovog zakona.

POGLAVLJE VI. SUBJEKTI ZAŠTITE DOBARA BAŠTINE

Član 50.

(Javne ustanove za obavljanje poslova zaštite i očuvanja dobara baštine)

(1) Stručne i sa njima vezane upravne poslove zaštite, očuvanja i korištenja dobara baštine u smislu ovog zakona, obavlja Zavod.

(2) Ustanove za obavljanje poslova zaštite i očuvanja dobara baštine su i muzeji, galerije, arhivi, biblioteke i druge javne ustanove kulture koje obavljaju stručne poslove u vezi sa zaštitom i očuvanjem dobara baštine.

Član 51.

(Poslovi Zavoda na zaštiti i korištenju zaštićenih dobara baštine)

Pored poslova djelatnosti utvrđenih osnivačkim aktom, Zavod u smislu ovog zakona obavlja i sljedeće stručne poslove na zaštiti i korištenju dobara baštine:

a) stara se o zaštiti, korištenju i obnovi zaštićenih dobara baštine,

b) utvrđuje mjere zaštite iz člana 14. ovog zakona i vrši nadzor nad njihovim provođenjem,

c) vodi Listu potencijalnih dobara baštine i Registar dobara baštine,

d) istražuje, proučava, obrađuje prikupljene podatke, valorizira i štiti nepokretna dobra baštine,

e) u postupku pripremanja prostorno-planskih dokumenata dostavlja raspoložive podatke i uslove za zaštitu nepokretnih dobara baštine i učestvuje u razmatranju prijedloga prostorno-planskih dokumenata,

f) dostavlja podatke o zaštićenim dobrima baštine Federalnom zavodu za zaštitu spomenika radi uspostavljanja centralnog registra,

g) na zahtjev Komisije za očuvanje nacionalnih spomenika, dostavlja tražene podatke za Registar dobara baštine od značaja za Bosnu i Hercegovinu,

h) obavlja i druge poslove na zahtjev Ministarstva.

Član 52.**(Muzeji, arhivi i druge javne ustanove kulture)**

(1) Javne ustanove kulture (muzeji, arhivi, galerije, biblioteke i kinoteke) u okviru svoje djelatnosti utvrđene posebnim zakonima, obavljaju poslove zaštite, čuvanja, prikupljanja, istraživanja, proučavanja, stručne obrade i prezentacije pokretnih dobara baštine.

(2) Poslove na zaštiti muzejske građe, kao dobara baštine prema odredbama ovog zakona, obavljaju muzeji i galerije u okviru svoje djelatnosti, u skladu sa propisima o muzejskoj djelatnosti.

(3) Poslove na zaštiti arhivske građe, kao dobara baštine prema odredbama ovog zakona, obavljaju arhivi u okviru svoje djelatnosti, u skladu sa propisima o arhivskoj djelatnosti.

(4) Poslove na zaštiti bibliotečke građe, kao dobara baštine prema odredbama ovog zakona, obavljaju biblioteke u okviru svoje djelatnosti, u skladu sa propisima o bibliotečkoj djelatnosti.

(5) Poslove na zaštiti filmske građe, kao dobara baštine prema odredbama ovog zakona, obavljaju kinoteke u okviru svoje djelatnosti, u skladu sa propisima o filmskoj djelatnosti.

POGLAVLJE VII. FINANSIRANJE ZAŠTITE DOBARA BAŠTINE**Član 53.****(Sredstva za održavanje i očuvanje zaštićenih dobara baštine)**

Sredstva za održavanje i očuvanje zaštićenih dobara baštine osigurava vlasnik, odnosno nosilac drugog prava na dobru baštine ako je vlasnik nepoznat, nedostupan ili je ugovorom na njih prenio prava i obaveze u smislu ovog zakona.

Član 54.**(Sredstva za zaštitu i obnovu dobara baštine)**

Sredstva za zaštitu i obnovu zaštićenih dobara baštine osiguravaju se iz budžeta Kantona u skladu sa finansijskim mogućnostima, kao i putem donacija domaćih i stranih pravnih i fizičkih lica, te grantova putem raspisanih javnih poziva viših nivoa vlasti.

POGLAVLJE VIII. NADZOR NAD PRIMJENOM ZAKONA**Član 55.****(Nadzor nad primjenom zakona)**

(1) Nadzor nad primjenom ovog zakona vrši Ministarstvo.

(2) Inspekcijски nadzor nad primjenom ovog zakona i propisa donesenih na osnovu ovog zakona vrši nadležna inspekcija u Kantonalnoj upravi za inspekcijske poslove Tuzlanskog kantona, u skladu sa zakonom.

POGLAVLJE IX. KAZNE ODREDBE**Član 56.****(Prekršaji i prekršajne kazne za pravna lica)**

(1) Novčanom kaznom u iznosu od 1.000 do 10.000 KM kaznit će se pravno lice za prekršaje koje:

a) ne prijavi dobro za koje se pretpostavlja da ima svojstvo dobra baštine (član 16. stav (1)),

b) uništi, izmijeni ili umanjí neko od svojstava potencijalnog dobra baštine ili ga izveze iz zemlje suprotno važećim propisima (član 16. stav (3)),

c) ukloni ili ošteti oznaku kojom je obilježeno dobro baštine (član 26. stav (3)),

d) ne dostavi Zavodu detaljne prostorno-planske dokumente,

radi ocjene usklađenosti dokumenata sa utvrđenim režimom zaštite zaštićenih dobara baštine (član 28. stav (2)),

e) pristupi izvođenju radova bez saglasnosti Zavoda ili se ne pridržava utvrđenih mjera zaštite koje odredi Zavod (član 29. stavovi (1) i (7)),

f) ne obustavi radove u slučaju otkrivanja dobra za koje se može pretpostaviti da ima svojstvo dobra baštine ili pojave nepredviđene opasnosti za zaštićeno dobro baštine i bez odlaganja ne obavijesti Zavod (član 30. stav (1)),

g) otpočne arheološka istraživanja bez odobrenja Ministarstva, odnosno vrši ih protivno uslovima i mjerama utvrđenim u tom odobrenju (član 32. stavovi (1) i (3)),

h) pronađena dobra ne preda Muzeju (član 33. stav (2)),

i) bez odobrenja Ministarstva iskopa, premjesti, ukloni, pokrije drugom građevinom, sadnicama ili na drugi način promijeni dobro baštine i njegov zaštitni pojas, te bitno promijeni kulturni krajolik i sliku mjesta (član 34.),

j) koristi zaštićeno dobro baštine suprotno mjerama zaštite utvrđenim u odluci o stavljanju dobra baštine pod zaštitu Kantona (član 35. stav (2)),

k) upotrijebi zaštićeno dobro baštine protivno namjeni dobra (član 35. stav (3)),

l) prilagodava zaštićeno nepokretno dobro baštine za određene potrebe ili namjene bez prethodne saglasnosti Ministarstva (član 36. stav (2)),

m) onemogući istraživanje i dokumentovanje kao i provođenje mjera zaštite i očuvanja zaštićenog dobra baštine licu koje za to ima odobrenje Zavoda (član 43. stav (1)),

n) odbije dati u posjed pokretno dobro baštine u svrhu izlaganja, odnosno onemogući posjećivanje nepokretnog dobra baštine radi razgledavanja (član 44. stav (1)),

o) ne ponudi pravo preče kupnje u skladu sa ovim zakonom (član 46. stav (1)),

p) otuđi zaštićeno dobro baštine pod povoljnijim uslovima od uslova koje je ponudio pravnim licima koja imaju pravo preče kupnje (član 46. stav (5)).

(2) Za prekršaj iz stava (1) ovog člana kaznit će se i odgovorno lice u pravnom licu novčanom kaznom od 300 do 3.000 KM.

(3) Za prekršaj iz stava (1) ovog člana kaznit će se i fizičko lice novčanom kaznom od 300 do 1.500 KM.

Član 57.**(Prekršaji i prekršajne kazne za javne ustanove)**

(1) Novčanom kaznom od 1.000 do 5.000 KM kaznit će se za prekršaj nadležna javna ustanova za obavljanje poslova zaštite i očuvanja dobara baštine ako u propisanom roku ne izvrši istraživanje, prepoznavanje i utvrđivanje da li pronađeno dobro ima svojstvo potencijalnog dobra baštine (član 16. stav (2)).

(2) Za prekršaj iz stava (1) ovog člana kaznit će se i odgovorno lice u nadležnoj javnoj ustanovi za obavljanje poslova zaštite i očuvanja dobara baštine novčanom kaznom u iznosu od 500 do 1.500 KM.

Član 58.**(Prekršaji i prekršajne kazne za Zavod)**

(1) Novčanom kaznom od 500 do 5.000 KM kaznit će se za prekršaj Zavod ako:

a) u propisanom roku ne donese rješenje o stavljanju potencijalnog dobra baštine pod prethodnu zaštitu Kantona i ukoliko navedeno rješenje ne dostavi vlasniku nepokretnog dobra baštine i nadležnoj službi za prostorno planiranje i

ukoliko ne dostavi rješenje vlasniku i nadležnoj javnoj ustanovi za zaštitu i očuvanje dobara baštine, ako se radi o pokretnom dobru baštine (član 17. stav (1)),

b) ne dostavi u roku od dvije godine od dana stavljanja dobra pod prethodnu zaštitu Kantona prijedlog za stavljanje dobra baštine pod zaštitu Kantona (član 21. stav (1)),

c) na propisan način ne obilježi zaštićeno dobro baštine (član 26. stav (1)),

d) ne dostavi nadležnom organu pregled nepokretnih dobara baštine koja imaju status potencijalnih dobara baštine, dobara baštine pod prethodnom zaštitom Kantona i zaštićenih dobara baštine, u postupku izrade prostorno-planskih dokumenata (član 28. stav (1)),

e) u propisanom roku ne odluči o zahtjevu za izdavanje saglasnosti za izvođenje radova (član 29. stav (4)),

f) ne obavijesti nadležne organe za pokretanje postupka obustave radova na dobru baštine dok se ne provedu utvrđene mjere zaštite, odnosno propusti da podnese zahtjev za naknadu štete (član 29. stav (7)),

g) uskrati vlasniku zaštićenog dobra baštine, na njegov zahtjev, besplatnu stručnu pomoć radi pravilne zaštite i očuvanja dobra baštine (član 39. stav (1) tačka b)).

(2) Za prekršaj iz stava (1) ovog člana kaznit će se i odgovorno lice u Zavodu novčanom kaznom od 300 do 1.500 KM.

POGLAVLJE X. PRIJELAZNE I ZAVRŠNE ODREDBE

Član 59.

(Donošenje podzakonskih akata)

Ministarstvo se obavezuje da u roku od šest mjeseci od dana stupanja na snagu ovog zakona donese provedbene propise:

a) Pravilnik o obliku, sadržaju i načinu vođenja Registra dobara baštine Tuzlanskog kantona iz člana 17. stav (6) ovog zakona,

b) Pravilnik o kategorizaciji dobara baštine iz člana 19. stav (2) ovog zakona,

c) Pravilnik o obilježavanju zaštićenih nepokretnih dobara baštine iz člana 26. stav (2) ovog zakona,

d) Pravilnik o tehničkim i kadrovskim uslovima za vršenje arheoloških istraživanja iz člana 32. stav (6) ovog zakona.

Član 60.

(Kontinuitet zaštite)

(1) Dobra baštine koja su stavljen pod zaštitu po propisima koji su važili na području Kantona do stupanja na snagu ovog zakona smatraju se zaštićenim dobrima baštine Kantona.

(2) Kategorizacija izvršena po dosadašnjim propisima smatra se važećom sve dok se ne uspostavi kategorizacija u skladu sa odredbama ovog zakona.

(3) Ministarstvo će, na prijedlog Zavoda, u skladu sa članom 19. stav (1) ovog zakona, izvršiti kategorizaciju zaštićenih dobara baštine iz stava (1) ovog člana u roku od pet godina od dana stupanja na snagu ovog zakona.

Član 61.

(Primjena međunarodnih konvencija)

Međunarodne konvencije - Konvencija za zaštitu kulturnih dobara u slučaju oružanog sukoba, Hag, 1954; Konvencija o zaštiti svjetske kulturne i prirodne baštine, Pariz, 1972; Konvencija za zaštitu podvodnog kulturnog naslijeđa, Pariz, 2001; Konvencija za zaštitu nematerijalnog kulturnog naslijeđa, Pariz, 2003; Konvencija o zaštiti graditeljske baštine Evrope, Granada, 1985; Evropska

konvencija o zaštiti arheološkog naslijeđa, London, 1969; Okvirna konvencija o vrijednosti kulturnog naslijeđa za društvo, Faro, 2005; Konvencija za zaštitu i promociju kulturnih različitosti, Pariz, 2005; Evropska konvencija o kulturi, Pariz, 1954; Konvencija o zaštiti arhitektonskog naslijeđa Evrope, Granada, 1985; Evropska konvencija o krajolicima, Firenca, 2000, kao i konvencije i drugi međunarodni multilateralni i bilateralni ugovori kojima pristupi ili koje ratifikuje Bosna i Hercegovina nakon stupanja na snagu ovog zakona su nadređene ovom zakonu i njihove odredbe obavezni su na odgovarajući način primjenjivati svi subjekti zaštite kulturne baštine na području Kantona.

Član 62.

(Prestanak važenja ranijih propisa)

Stupanjem na snagu ovog zakona prestaje s primjenom Zakon o zaštiti i korištenju kulturno-historijskog i prirodnog naslijeđa („Službeni list SRBiH“, br. 20/85, 12/87 i 3/93) na području Kantona.

Član 63.

(Stupanje na snagu)

Ovaj zakon stupa na snagu osmog dana od dana objavljivanja u „Službenim novinama Tuzlanskog kantona“.

Bosna i Hercegovina

-Federacija Bosne i Hercegovine-

TUZLANSKI KANTON

Skupština

Predsjednik

Skupštine Tuzlanskog kantona

Broj: 01-02-336-9/19

Tuzla, 14.10.2020. godine

Žarko Vujović, v.r.

1052

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj 14.10.2020. godine, donosi

ZAKON

O PODRŠCI NEDOVOLJNO RAZVIJENIM, NERAZVIJENIM I IZRAZITO NERAZVIJENIM JEDINICAMA LOKALNE SAMOUPRAVE U TUZLANSKOM KANTONU

I. OPĆE ODREDBE

Član 1.

(Predmet zakona)

Ovim zakonom utvrđuju se uslovi koje jedinice lokalne samouprave moraju ispunjavati da bi ostvarile podršku iz budžeta Tuzlanskog kantona (u daljem tekstu: budžet Kantona), definišu se pokazatelji za mjerenje stepena njihove razvijenosti, te način ostvarivanja podrške i drugih podsticajnih mjera koje će pridonijeti njihovom privrednom i općem razvoju, u skladu s njihovim posebnostima i načelu ravnomjernog razvoja Tuzlanskog kantona (u daljem tekstu: Kanton).

Član 2.

(Opći uslovi za ostvarivanje podrške)

Opći uslovi koje jedinice lokalne samouprave u Kantonu moraju ispunjavati da bi ostvarile podršku u skladu sa ovim zakonom su: